


PAN-EVROPSKI UNIVERZITET
"APEIRON" BANJA LUKA
Broj: 1924 12
Datum: 08.08.2012. godine



JAHAČ APOKALIPSE

(Ili odakle je Kurta ne znam, ali Murta je sasvim sigurno iz Konjica...)

Svi ovih dana nestrpljivo očekuju spisak najvećih poreskih dužnika u Federaciji BiH. Iskreno da kažem, baš i ne razumijem zašto se diže tolika frka kada je svakoj iole realnijoj osobi jasno na šta će to ličiti. Na prvih 30 mjesta sasvim su sigurno državne firme, koje onako sposobno, savjesno i nadasve odgovorno vodi *Federalna vlada*. Pa, valjda na osnovu tako sjajnih referenci i stečenog iskustva traži npr. od dioničara *Bosnalijeka* da im povjere upravljanje kompanijom. Čim trenutni Kurta sjaše, milom ili silom iliti *Finansijskom policijom*, namah će uzjahat *Vladin Murta* i eto ljepote. Ko ne vjeruje, neka konsultuje *Pretis, Željeznice Federacije BiH, Konjuh, Željezaru Zenica, Borac Travnik* i sve ostale kompanije koje su dosad bile, što direktno, što indirektno pod Murtom...

Zabrinjava, međutim, činjenica da se ovo ekonomsko menadžersko ludilo vlasti ne samo nastavlja, već i ubrzava. Kao narkoman koji jednostavno ne može-ne samo prestati uzimati drogu, nego ne može ni prestati povećavati dozu-tako i *Federalna vlada* šizofreno, što milom (*Pretis, Konjuh* i sl.), što silom (*Bosnalijek* u pokušaju), pod Murtu podvodi sve više i više firmi.

Zašto, pitaju se naivni. Pa, vrlo jednostavno-u Živinicama je javna tajna da se ponovo tempiraju bombastična obećanja baš pred općinske izbore, ko ne zna šta znači glagol "bombati", bujrum u Živinice. A ni Zavidovići nisu daleko, jer *Krivaja* ima šansi taman kao grudva snijega u džehennemu/paklu. Bitno je podijeliti neku crkavicu ili apsolutno nezakonito natjerati *Razvojnu banku* da da kredit koji će se vratiti u roku - nikad. Ali koga to sekira, moliću lijepo? Gospodina Murtu sasvim sigurno ne, bar još dvije godine... A do tada treba dobiti ovu bitku za čovjeka, onu oktobarsku. Oprobano, nema boljeg recepta za dobijanje izbora od asfaltiranja puteva, presijecanja vrpce po raznim osnovama i dijeljenja sadake onima koje su baš oni i napravili sirotinjom.

Ali neko je nekada rekao da "sve ljude možete praviti budalama neko vrijeme, neke ljude možete praviti budalama sve vrijeme, ali NIKAD ne možete praviti budalama sve ljude sve vrijeme".

Pa makar bili i jahač apokalipse i makar bili iz Konjica...**B**

Aida Delić,
glavna i odgovorna urednica